

Powšitkowne WOZJEWJENJA

njedźelu, 22. nowembra 2020

Wusyłanje Božeje mše live

Serbskorěčnu Božu mšu móža wěriwi tutu njedźelu, 22. nowembra, znowa jako live-stream w interneće scěhować. Dopódnja w 9 hodź. přenjese so wona z Chróšćanskeje cyrkwyje. Link na nju je na internetowej stronje www.posol.de podaty.

Adwentny kalender za dźěći

Dekanatne dušepastyrstwo za dźěći we Worklecach poskići lětsa adwentny kalender za dźěći. Wšědnje dóstanu wone z póštu adwentne woknješko připóslane. Protyčka je w třoch wariantach za pěstowarske dźěći kaž tež za šulerjow 1. do 4. lětnika a 5. do 8. lětnika přihotowana. Zajimcy njech so prošu hač do srjedy, 25. nowembra, přez link, kiž je pod www.posol.de podaty, přizjewja. Nadrobniše informacije dóstanu woni we Worklecach, telefonowe čisło (03 57 96) 8 87 07, mailowa adresa worklecy-kise@gmx.de.

Wo česćowanju swjateho Bosćana

Wustajeńcu wo česćowanju swjateho Bosćana w Chróšćanskej wosadze móža sej zajimcy dlěje hač dotal planowane, mjenujcy hač do njedźele, 6. decembra, w Budyskej tachantskej cyrkwi wobhladać. Přistupna je wona za čas wotewrjenja simultaneje cyrkwyje wot póndźele do soboty wot 10 do 16 hodź. a njedźelu wot 12 do 16 hodź.

Rozšěrja wotewrjenske časy

Hladajo na to, zo w klóštrje Marijinej hwězdze adwentne wiki koronoweje pandemije dla njebudu, rozšěrja w tamnišim klóšterskim wobchodze wotewrjenske časy. Na wšitkich štyrjoch sobotach do adwentnych njedźelow wjesela so tam wot 10.00 do 16 hodź. na hosći. Sobotu, 12. decembra, předawaja na klóšterskim dworje zdobom božodzěšćowe štomy.

TCM podpěra dušepastyrski projekt fararja dr. Dzikiewicza

Dary za Pólsku hromadza so hakle klětu

Towarstwo Cyrila a Metoda z.t. (TCM) chce ze swojej akciju „Łužica pomha“ tónkróc projekt fararja dr. Daniela Dzikiewicza, kotryž je dobre džewjeć lět w Chróšćicach skutkował, financielnje při twarje wosadnicy we Wojdatach podpěrać. Tu trjeba wón, zo by w swojej wosadze z mnohimi młodymi swójbami – lětsa mějachu 80 přenjowoprawjenskich dźěći a runje telko křćeńcow – porjadnje pastoralnje skutkować móht. Wobšěrnyje je projekt w Katolskim Posole z 25. oktobra wopisany. Pjenježne dary móža so na konto Cyrill-Methodius-Verein e.V., IBAN: DE 65 750 90 300 000 828 23 66, pod hesłom „Litawska“ přepokazać. Štóž sej darowansku kwitowanku přeje, měł swoju dospołnu adresu zdžělić.

Předsyda TCM Jurij Špitank skedźbnja na to, zo towarstwo w akciji „Łužica pomha“ koronoweje krizy dla lětsa nazymu za Pólsku dary njehromadzi, kaž je wone to zašle lěta činiło. Dalokož móžno, ma so to klětu nalěto nachwatać.

Hromadža hodowne pakćiki džěcom a swójbam w Čěskej a Bołharskej

Towarstwo swjateje Filomeny z.t. chce tež lětsa džěci a swójby w čěskim Dolním Podluží kaž tež w bołharskim Razgradže a wokolnych wsach z hodownymi pakćikami zwjeselić. Jich wobsah njeje předpisany, móžne pak su hrajk, pisanske materialije, slódkosće abo kakaw. Za spomóžne ma wone, jeli bychu pakćiki nalěpk měli, za koho su myslene, na přikład „swójba“, „holca 14–16 lět“ abo „hólc 0–4 lět“. Wotedać móža so pakćiki wot póndžele do štwórtka, 23. do 26. nowembra, stajnje wot 17 do 18 hodž. w Smjerdžečanskim kulturnym domje. W tym času přijimuju tohorunja počehnjenja abo higieniske twory. Trjebanu drastu abo črije pak lětsa njehromadža. Dalša móžnosć podpěranja su pjenježne dary, z kotrychž matej so transportaj financować kaž tež wšelake socialne zarjadnišća podpěrać. Přepokazać móža so na konto St.-Filomena-Verein e.V., IBAN: DE45 8559 0000 0372 6247 01 pola Ludoweje banki Budyšin e.G. pod hesłom „Hilfsaktion“.

Onlinowa konferenca k scěham korony w cyrkwi

Na wuchodoněmskich cyrkwinskih wikach „die pastorale!“ móža so wšitcy zajimcy online wobdželeć. Dohromady přewjedu so tři rozmołwne zarjadowanja, kotrež zaběraja so z tym, kak stej so towaršnosć powšitkownje a wosebje cyrkwinske žiwjenje pandemije dla změniłoj. W rozmołwje wutoru, 24. nowembra, wot 18 do 19.30 hodž. wěnuja so prašenju, što korona z dušepastyrstwom čini, a wutoru, 15. decembra, kotry wliw ma wona na Bože služby. Při tym póndže mjez druhim wo pro a contra přenošowanja Božich službow w interneće. Přenje zarjadowanje kónc oktobra dyrbješe so krótkodobnje wotprajić a ma so snano pozdžišo nachwatać. W nim ma so prašenje wobjednać, što korona w towaršnosći wuskutkuje. Link k onlinowej konferency je pod www.posol.de wozjewjeny. Zarjadowarjo su wjacore katolske gremije a institucije wuchodoněmskich biskopstwow.